

Angerlarsimaffimmi ikiorteqartitsisarneq

pillugu

ilitsersuut

Angerlarsimaffimmi ikiorteqartitsisarneq pillugu ilitsersuut

Angerlarsimaffimmi ikiorteqartitsisarneq pillugu ilitsersuut kommunip ingerlatsinermini angerlarsimaffimmi ikiorteqartitsisarneq pillugu inatsisinik paasinninnissaanut ilitsersuutaavoq.

Pisortanit ikiorsiissutit pillugit Inatsisartut peqqussutaat nr. 10, 10. november 1982-imeersoq aamma angerlarsimaffimmi ikiorteqartitsisarneq pillugu Namminersornerullutik Oqartussat nalunaarutaat nr. 32, 26. juli 1994-imeersoq angerlarsimaffimmi ikiorteqartitsisarnermi malittarisassatut atuupput.

Angerlarsimaffimmi ikiorteqartitsisarneq pillugu ilitsersuut manna suliassaqarfimmi inatsisinut atuuttunut taarsiisuunngilaq. Peqqussutit nalunaarutillu innuttaasut pisinnaatitaaffiinik nassuiaasuupput inatsisillu taakku inuiaqatigiinni tamanut atuutsitsisussaapput. Angerlarsimaffimmi ikiorteqartitsisarneq pillugit ilitsersuut inatsisaanngilaq, kisiannili ilitsersuutaavoq, Ilaqutariinnermut Pisorta qarfiup angerlarsimaffimmi ikiorteqartitsisarneq pillugu malittarisassanik paasinninneranik takutitsisuulluni aammalu kommunit suliassaqarfimmik allaffissornikkut aqutsineranni kommunimut ilitsersuutaalluni.

Naliginnaasumik aalajangersakkat.

Innuttaasut angerlarsimaffimmi ikiorteqartinneqarnissamik periarfissaqarput inooqataanermi pissutsit tunngavigalugit aammalu peqqissutsimut pissutsit tunngavigalugit.

Angerlarsimaffimmi ikiorteqarnissamik qinnuteqarneq pissusiviusuni pisinnaavoq peqqinnissaqarfimmi atorfillit, soorlu napparsimavimmi innuttaasoq sinnerlugu qinnuteqaassussinerisigut.

Aammattaaq kommunip isumaginnittoqarfiani atorfillit nammineerlutik innuttaasut angerlarsimaffimmi ikiorteqarnissaat inassutigisinnaavaat.

Angerlarsimaffimmi ikiorteqarnissaq aamma innuttaasumit namminermit imaluunniit taassuma ilaqutaanit qinnuteqaatigineqarsinnaavoq, innuttaasup imaluunniit ilaqutaasut nalilersimappagu suliassanut imaluunniit inuttut paaqqutarinissamut ikiorserneqarnissamik pisariaqartitsisoqartoq.

Inuit pisinnaatitaasut.

Ataavartumik angerlarsimaffimmi ikiorteqartitsisoqarsinnaavoq kikkunnulluunniit suliassanut imaluunniit inuttut ikiorserneqarnissamut pisariaqartitsisunut.

Innuttaasut utoqqaat nalinginnaasumik angerlarsimaffimminnik paaqqutarinnissinnaajunnaarsimasut angerlarsimaffimmi ikiorteqartinneqarnissaat neqeroorutigineqarsinnaavoq.

Innuttaasut annertuumik innarluutillit ikiorserneqartarnerat pillugu peqqussummi ikiorserneqarsinnaatitaasunut ilaasut ataavartumik angerlarsimaffimmi ikiorteqarnissaat neqeroorutigineqarsinnaapput, tamatumani nammineerlutik suliassat sularisinnaasimangippasigit.

Angerlarsimaffimmi ikiorteqartitsisarneq pillugu malittarisassat inuit annertuumik innarluutillit ikiorserneqartarnerat pillugu malittarisassanit salliutinneqassapput. Innarluutillit pillugit malittarisassat aatsaat atorneqassapput, isumaginninnermi inatsisit allat naapertorlugit ikiorsinissamut periarfissaqarsimangippat.

Taamaalilluni pingaaruteqarpoq innuttaasut annertuumik innarluutillit pillugit iliuusissanik pilersaarusiortoqaraangat innuttaasut ataasiakkaat angerlarsimaffimmi ikiorteqarnissamik pisariaqartitsinerat pillugu kommunip naliliisarnissaa.

Amerlanertigut innuttaasut annertuumik innarluutillit suliassanut – illup iluanut assigiinngitsutigut suliassanut aammalu imminut eqqiluitsuutinniarnermut angerlarsimaffimmi ikiorteqarnissamik pisariaqartitsisarput.

Ilaqutariit innarluutilimmik meerallit imaluunniit innarluutilimmik ilaquttaminnik najugaqateqartut aamma angerlarsimaffimmi ikiorteqarnissamik neqeroorfigineqarsinnaapput. Taamaattoqartillugu angerlarsimaffimmi ikiorteqartitsisoqarsinnaavoq illup iluani suliassanik oqilisaassinissamut, taamaalillutik angajoqqaat ilaannikkut ulluinnarni suliassanit sunngiffeqalaartinniarlugit.

Angerlarsimaffimmi ikiorteqarnissamik akuersisoqartillugu siunertarineqartariaqarpoq innuttaasup pissutit naleqquttut aallaavigalugit sivisunerpaamik angerlarsimaffimmiinnissaa. Angerlarsimaffimmi ikiorteqartitsineq utoqqaap imaluunniit innarluutillip toqqissisimasumik avatagiiseqarnissaanut qularnaareqataasinnaavoq.

Angerlarsimaffimmi ikiorteqartitsisarnerup iluani siunertaqarluartumik suliniuteqarneq taamaalilluni innuttaasup najukkami avatagiisinniinnarnissaanut aammalu najukkami attaveqaataasut najuinnarnissaannik aammalu ilaqtannut ikinngutinullu qanittumik attaveqaannarnissamut iluaqutaasussaavoq.

Utaqqiisaagallartumik angerlarsimaffimmi ikiorteqartitsisoqarsinnaavoq pissutit ataavartuunngitsut tunngavigalugit. Utaqqiisaagallartumik angerlarsimaffimmi ikiorteqartitsisoqarsinnaavoq naartunermut

meerartaarnermullu atatillugu, innuttaasoq imaluunniit ilaqutariit piffissami sivikitsuinnarmi illup iluani suliassanik oqilisaanneqarnissamik pisariaqartitsisoqarpat.

Aamma utaqqiisaagallartumik angerlarsimaffimmi ikiorteqartitsisoqarsinnaavoq innuttaasoq napparsimasianerup kingorna eqqissisimaarnissamik pisariaqartitsippat. Tassani innuttaasunik suliarineqarnissamut tunngalluinnartup saniatigut pisariaqanngitsumik napparsimavimmiinnginnissaq angerlarsimaffimmi ikiorsiinikkut qularnaarneqarsinnaavoq. Innuttaasoq utaqqiisaagallartumik angerlarsimaffimmi ikiorteqartinneqarnikkut sukkanerusumik najukkami attaveqaatiminut utersinnaavoq ilaqutaasut innuttaasup ikiorsertariaqarneratigut naapertuutinngitsumik artorsinngikkaluarlugit.

Isumaginninnermi ingerlatsivimmi iliuusissanik pilersaarusiornermut atatillugu aamma kommuni utaqqiisaagallartumik angerlarsimaffimmi ikiorteqartitsisinnaavoq. Taamaalilluni ilaqutariinnut angerlarsimaffimmi ikiorsisoqarsinnaavoq taakkua / inersimasup inooqataanermi pissutsinik aallaaveqartumik ulluinnarni illup iluani suliassat peqataaffigisinnaanngippagit imaluunniit allatigut angerlarsimaffiup paaqutarinissaanut ikiuussinnaanngippat. Tassani angerlarsimaffimmi ikiorteqartitsinermi ilaqutariit aaqqissuussaaneranni ajunnginnerpaamik tunngavissaqartitsinissaq qularnaarneqassaaq aammalu ilaqutariittut inuunermi toqqissisimatitsissalluni. Inooqataanermi pissutsit tunngavigalugit angerlarsimaffimmi ikiorteqartitsinermi innuttaasup inooqataanermi ajornartorsiutaanut tunngatillugu iliuusissanik pilersaarummi ersarissumik siunertaq nassuiarneqarsimassaaq.

Kommuni aamma sivikitsukkuutaartunik utaqqiisaagallartumik angerlarsimaffimmi ikiorteqartitsisinnaavoq, tassani pineqarpata ilaqutariit ilaqutaasup ilungersunartumik napparsimanagera imaluunniit toqulerneru pissutigalugu ikiorserneqartariaqartut. Tassani angerlarsimaffimmi ikiorteqartitsisoqassaaq ilaqutariinnut oqilisaassinertut napparsimaruluttumut imaluunniit toqulersumut sapinngisamik toqqissisimatitsinissaq qularnaarniarlugu. Taamaattoqartillugu utaqqiisaagallartumik angerlarsimaffimmi ikiorteqartitsisoqassaaq napparsimasup imaluunniit toqulersup ilaqutaasa napparsimaruluttup imaluunniit toqulersup najornissaanut nukissaqarnissaat eqqarsaatigalugu.

Angerlarsimaffimmi ikiorteqarnermi akiliuteqartarneq.

Angerlarsimaffimmi ikiorteqarnermi akiliuteqartarnermi apeqqutaavoq ikiorserneqartoq inoqutigiiittut qanoq isertitaqarnerisooq. Taamaalilluni angerlarsimaffimmi ikiorteqarnermut akiliuteqartoqarnissaanut ataatsimut isertitat tunngaviusussaapput.

Aningaasat isumaginninnermi tunniunneqartartut sukkuulluunniit atuuttut pillugit Ilaqutariinnermut Pisortaqarfiup kaajallaasitaani akit atuuttut takuneqarsinnaapput. Innuttaasup angerlarsimaffimmi ikiorteqarnermi akiliuteqarnerani angerlarsimaffimmi ikiorteqartitsinermi aningaasarsianut aningaasartuutaavissimasut sinnerlugit akiliuteqartitsisoqarsinnaanngilaq.

Angerlarsimaffimmi ikiorteqarnissamik kissaateqartoq pisussaavoq kommuni paasissutissanik pisariaqartunik tunniussivigissallugit, tamatumani pineqarput inoqutigiit ataatsimoortumik isertitai angerlarsimaffimmi ikiorteqarnermi akiliuteqartitsinissamik aalajangiinnermi tunngavigineqartussaasut.

Kommunip qularnaassavaa innuttaasup aningaasat isumaginninnermi tunniunneqartartut sukkulluunniit atuuttut pillugit Ilaqutariinnermut Pisortaqarfiup kaajallaasitaani akit atuuttut naapertorlugit akiliuteqarnissaa.

Angerlarsimaffimmi inooqataanermi pissutsit tunngavigalugit utaqqiisaagallartumik angerlarsimaffimmi ikiorteqartitsisoqartillugu tassunga akiliuteqartitsosoqassanngilaq, qanorluunniit inoqutigiit ataatsimoortumik isertitaqaraluarpata.

Innuttaasup angerlarsimaffimmi ikiorteqaruni sulinerup ingerlanneqarsimanera uppersarsarlugu atsiussaaq. Taamaaliornermigut innuttaasup akuerissavaa angerlarsimaffimmi ikiorteqarsimalluni aamma atsiornermigut ikiorsiinerup suunera annertussusaalu uppersarsarlugu akuerissallugu.

Angerlarsimaffimmi ikiortip suliassaqarfia suliassaalu.

Angerlarsimaffimmi ikiorteqartitsisoqarsinnaavoq suliassanut aammalu inummut tunngasunut.

Angerlarsimaffimmi ikiorteqartitsinermi angerlarsimaffimmi ulluinnarni suliassanut aammalu nammineq eqqiluutsuunissamut atisalersornermullu ikiorsiisoqarsinnaavoq.

Angerlarsimaffimmi ikiorteqartitsisoqartarpoq suliassanut ulluinnarni pisassanut sungiusaanissaq pineqanngippat. Innuttaasoq piffissami sivisunerusumi timikkut eqqiluisaarnermut, atisalersornermut, pisiniarnermut, eqqiaanermut il.il. ikiorneqarnissamik pisariaqartitsippat kommuni pisussaa-voq innuttaasup angerlarsimaffimmi ikiorteqarnissamik pisariaqartitsinera naliliivigissallugu.

Taamaalilluni angerlarsimaffimmi ikiorteqartitsineq tassaavoq innuttaasumut ikiorsiineq tapersorteqarnermilu suliassat innuttaasoq peqatigalugu suliarineqartarlutik.

Innuttaasoq kiassarnermut ikiorserneqarnissaminik pisariaqartitsisimappat utoqqaassusini imaluunniit peqqissutsini pissutigalugit taassuminnga nammineerluni isumaginnissinnaanngippat tassunga tapersersuinerlut aamma angerlarsimaffimmi ikiorteqartitsisoqarsinnaavoq.

Angerlarsimaffimmi ikiorteqarti nalinginnaasumik ulluinnarni suliassanut ikiuutissaaq kisiannili errorsersuarnermut illulluunniit tamakkiisumik eqqiarneqarneranut ikiuunnissamut pisussaaffeqarani.

Tamatumunnga ikiunnissamik pisariaqartitsisoqarpat aatsaat tamanna pisinnaavoq angerlarsimaffimmi ikiorteqarnermi aqutsisoq sioqqutsisumik isumaqatigiissuteqarfigereerneratigut.

Angerlarsimaffimmi napparsimasunik paarsineq angerlarsimaffimmi ikiortip suliassarpiaanut ilaangilaq. Angerlarsimaffimmi ikiortip napparsimasunut attuumassuteqartumik suliassarai inuup eqqiluutsuunissaanut, nerinerani, iisartakkanik nakorsap innersuussimasaanik iioraanissamut ikiunissaq kiisalu angerlarsimaffimmi naliginnaasumik suliassanik ikiunissaq.

Peqqinnissaqarfiup napparsimasunut tunngatillugu suliassaa tassaavoq mattusersuutini taarseraanissaq, ikinik paarsinissaq kiisalu kapuutit atorlugit nakorsaasersuinissaq.

Angerlarsimaffimmi ikiorti inummit sullitaminit aningaasarsiassanik imaluunniit allatigut akissarsiassanik tiguseqqusaanngilaq.

Aamma angerlarsimaffimmi ikiorti inummit sullitaminit atorniaqqusaanngilaq aammalu suliffiup nalaani angerlarsimaffimmi ikiortip nerisassani nammineepluni isumagissavai. Taamaattumik angerlarsimaffimmi ikiorteqartitsisarneq pillugu aalajangersakkat naapertorlugit ikiorteqartitsisoqartillugu inummit sullitamit nerisaqarnissaq pisinnaanngilaq.

Angerlarsimaffimmi ikiorti taamaallaat kommunimit akissarsiaqartinneqassaaq.

Aqutsineq

Angerlarsimaffimmi ikiorteqartitsineq kommunimit aqunneqarpoq. Kommunip innuttaasut kommunimi najugaqartut akisussaaffigai aammalu taakkununnga angerlarsimaffimmi ikiorteqartitsinissamik akuersisinnaatitaalluni.

Kommunip angerlarsimaffimmi ikiorteqarnermut tunngasunik ulluinnarni aqutsinera angerlarsimaffimmi ikiortit pisortaannik ingerlanneqarpoq, taanna kommunimit toqqarneqarluni atorfinitsinneqartarluni.

Kommunip angerlarsimaffimmi ikiorteqartitsinerani ulluinnarni aqutsisoq qaammat ilivitsaq tikillugu angerlarsimaffimmi ikiorteqartitsinissamik aalajangiisnaatitaavoq. Tamanna sinnerlugu akuersissuteqarnissaq kommunalbestyrelsimut / kommunimi ataatsimiititaliamut suliassaqqarfimmut politikkikkut akisussaasumut saqqummiunneqassaaq.

Kommunalbestyrelsi / kommunimi ataatsimiititaliaq tamatuma kingorna aalajangiisnaaq ikiorsiineq ingerlaannassanersoq isumagissallugulu angerlarsimaffimmi ikiorteqarnissamik neqerooruteqarneq allatut ikiorsiinissamik tapertaqartinneqassanersoq.

Naliliinnermi qularnaassallugu pingaaruteqarpoq ikiorsiineq ataavartumik ingerlasussaq innuttaasup pisariaqartitaanut naapertuuttuusooq.

Angerlarsimaffimmi ikiorteqartitsinnermi sulinerup oqartussanut allanut atuisunullu naapertuuttumik ataqatigiissaarneqarnissaa kommunip akisussaaffigaa.

Taamaalilluni pingaaruteqarpoq angerlarsimaffimmi ikiorteqartitsinissamik akuersissuteqarneq inatsisinut allanut, ilaatigut annertuumik innarluutillit ikiorserneqartarnerat pillugu inatsisinut ataqatigiisitsinissaq.

Naammagittaalliuuteqartarnek.

Kommunip tapersersortinut tiimit pillugit aalajagiiguni innuttaasumut aalajangernini pillugu nassiussissaaq.

Aalajangernermi innuttaasooq tamakkiisumik qinnuteqaataa pillugu akuerineqanngippat aalajangerneq naammagittaalliuuteqarsinnaanermik ilitsersuummik ilaqartinneqassaaq.

Innuttaasup isumaqaruni pisinnaatitaanini eqquutsinneqanngitsoq aalajangerneq naammagittaalliuutigisinnaavaa. Innuttaasup aamma aalajangernerup naammagittaalliuutiginissaanut ikioqqulluni kommuni piumaffigisinnaavaa.

Tapersersortinut tiimit pillugit qinnuteqaatit aalajangiiffigineqarneri Isumaginninnermi Naammagittaalliuuteqartarfimmut ingerlatinneqarsinnaapput aalajangerneq pillugu qinnuteqartup tigusaqarneranit sapaatip akunneri sisamat qaagiutsinnagit.

Isumaginninnermi Naammagittaalliuuteqartarfik aalajangernermit isumaqataasinnaavoq imaluunniit aalajangerneq ilaannakortumik tamakkiisumilluunniit allannortissinnaallugu.

Isumaginninnermi Naammagittaalliuuteqartarfiup aalajangeereernerani allaffissornikkut naammagittaalliuuteqarnissamut periarfissaaruttarpoq.

Innuttaasut ataasiakkaat Isumaginninnermi Naammagittaalliuuteqartarfimmit aalajangikkamik naammaginninngikkunik eqqartuussivimmut suliakkiissuteqarsinnaavoq imaluunniit ombudsmandimut naammagittaalliorsinnaalluni.